

جواب یصل لرئیس مصر

الاسم • عبد الرازق فرحان

السن • عشرين جرى وعشرين شقى وعشرة جعان

السكن • بيت صغير فى ام الدنيا وبلد الجدعان

عزيزى رئيسى

بكتبك جواب على ورق البردى وانا بردان

دى رسالة ولا عاوز لايك ولا تعليق ولا استئذان

انا مصرى ومواطن وعبد الرازق ومش فرحان

زعلى متدوب مع فرحى وبشرية من قعر الفنجان

غضبى قاعد على حجر املى بيحكيله حكاوى زمان

طرت لفوق فجأه وقعت بعد ماخذت على الطيران

شلت بأيدى ميت ثوره وبايدى شلت العميان

بايدى شلت العلم وبايدى شلت الاخوان

ليا معاك بس يا ريس كلمه مع كام سوال

هى مصر هتحيامتى وهى اعظم البلدان
 ازاي اتحمل حرها وخانقنى حزام الامان
 ماتيجى بقى نقعد سوا وتكلمنى بكل حنان
 نور عينيك بس ازاي وانا وشى مطفى وهلكان
 شوف بعينيك ننى عينيك قاعد يحسب بكرة بكام
 ماسك يومه زنقه فى حيطه انه ما يولد تانى ايام
 ولا الفراعنه جت لغنتهم بعد ثورة بعد ميدان
 سيب مكانك يلا وخش جوة بيوت جوه غيطان
 ادخل بيتى عيش حياتى هتقوم من رعبك عرقان
 وادخل بيت سارق بلدى نافخ ريشه وریشه نعام
 عيش جوه بيوت وحوارى جوه قهاوى واطلب شاي
 اشرب قهوة مرها غطى على اكله منها ارفان
 عيش فى قلوبنا هتسمع نبضه مصر وريس جوه كيان
 مجلس نايم كرسيه عايم مصنوع من دم الغلبان
 وقرارة بينقط سكر خلانى بالسكر عيان

مصر غنيه بس فقيرة مصر صبية بطقم سنان
فيها النيل وسمكه ميت شارب توهه فى التوهان
فيها هرم واقف يبكى مع زائر راح له فرحان
فيها عقول منها الصاحى والمتغى والنيسان
فيها ايادى للخير بتنادى وايادى تهد البنيان
فيها خير طالع بره مسكاه ايد الامريكان
ليه لما تيجى سيرتك جارى يقوم يبكى وندمان
وتقلب القعده غم بعد ما كانت سهرة جنان
وحدنا يا ريس تحت علمنا خلى الابيض فى علمى بيان
عيش جوانا يا ريس لحظه عيش جوة رغيغ الغلبان
حط فيه حطة كفته حبة فول مش طمعان
وافتكر علمت عليك بالازرق وبخط بيان
ومضيت وبكامل عقلى عبد الرازق وكان فرحان
عبد الرازق وكان فرحان